

**BOSNA I HERCEGOVINA
FEDERACIJA BOSNE I HERCEGOVINE
VLADA**

NACRT

Z A K O N

**O IZMJENAMA I DOPUNAMA ZAKONA O SUKOBU INTERESA U ORGANIMA
VLASTI U FEDERACIJI BOSNE I HERCEGOVINE**

Sarajevo, septembar 2014. godine

**ZAKON
O IZMJENAMA I DOPUNAMA ZAKONA O SUKOBU INTERESA U ORGANIMA
VLASTI U FEDERACIJI BOSNE I HERCEGOVINE**

Član 1.

U Zakonu o sukobu interesa u organima vlasti u Federaciji Bosne i Hercegovine („Službene novine Federacije BiH“ broj 70/08) u članu 13. riječi: „Centralne izborne komisije Bosne i Hercegovine“ zamjenjuju se riječima: „Komisije za odlučivanje o sukobu interesa (U daljem tekstu: Komisija)“.

Član 2.

Iza člana 13. naziv trećeg poglavlja mijenja se i glasi:

**„III. IMPLEMENTACIJA I POSTUPAK PRED KOMISIJOM ZA
ODLUČIVANJE O SUKOBU INTERESA“.**

Član 3.

Član 14. mijenja se i glasi:

**„Član 14
Implementacija**

Komisija odlučuje da li neko stanje, postupak ili radnja predstavlja kršenje odredaba ovog zakona kao i o svakoj stvari u vezi sa implementacijom ovog zakona u skladu sa Zakonom o sukobu interesa i institucijama vlasti Bosne i Hercegovine („Službeni glasnik BiH“, br. 16/02, 14/03, 12/04 i 63/08)“.

Član 4.

Član 15. mijenja se i glasi:

„Član 15.

Postupak pred Komisijom

Postupak pred Komisijom pokreće se i vodi u skladu sa Zakonom o sukobu interesa u institucijama Bosne i Hercegovine“.

Član 5.

Član 16. mijenja se i glasi:

„Član 16.

Sankcije

(1) Sankcije koje Komisija može izreći izabranom zvaničniku, nosiocu izvršne funkcije ili savjetniku su: obustava isplate dijela neto mjesečne plaće, prijedlog za razrješenje s dužnosti i poziv za podnošenje ostavke.

(2) Ako se utvrdi da je izabrani zvaničnik, nosilac izvršne funkcije ili savjetnik povrijedio odredbe čl. 4., 7., 8., 10. i 11. ovog zakona, Komisija izriče sankciju obustave isplate do 50% neto mjesečne plaće vodeći brigu o težini i posljedicama povrede zakona.

(3) Ako se utvrdi da je izabrani zvaničnik, nosilac izvršne funkcije ili savjetnik povrijedio odredbe čl. 5., 6. i 9. ovog zakona, Komisija izriče sankciju obustave isplate do 30% neto mjesečne plaće vodeći brigu o težini i posljedicama povrede zakona.

(4) Sankcija obustave isplate dijela neto mjesečne plaće izabranog zvaničnika, nosioca izvršne funkcije ili savjetnika ne može trajati duže od 12 mjeseci, a iznos obuhvaćen obustavom ne smije prelaziti jednu polovinu neto mjesečne plaće izabranog zvaničnika, nosioca izvršne funkcije ili savjetnika.

(5) Izuzetno od odredbi stava 4. ovog člana, obustava isplate dijela neto mjesečne plaće izabranog zvaničnika, nosioca izvršne funkcije ili savjetnika može trajati duže od 12 mjeseci sve do razrješenja s dužnosti, odnosno podnošenja ostavke ili otklanjanja razloga koji su ga doveli do sukoba interesa u skladu s članom 16a. stav (4) ovog zakona.

(6) Odluka o sankciji dostavlja se lično izabranom zvaničniku, nosiocu izvršne funkcije ili savjetniku. Radi provođenja, izvršnu odluku Komisija dostavlja službi koja vrši obračun plaće izabranom zvaničniku, nosiocu izvršne funkcije ili savjetniku.

(7) Izabrani zvaničnik, nosilac izvršne funkcije ili savjetnik obavezan je vratiti poklon ili novac koji je ekvivalentan vrijednosti poklona i dobit ostvarenu od naknada za obavljanje javne funkcije zbog koje je bio u sukobu interesa, o čemu Komisija donosi zaključak.

(8) Ako je primjereno vrsti povrede, Komisija može tokom postupka naložiti izabranom zvaničniku, nosiocu izvršne funkcije ili savjetniku da otkloni uzroke postojanja sukoba interesa u određenom roku te, ako izabrani zvaničnik, nosilac izvršne funkcije ili savjetnik to učini, može obustaviti postupak ili ga dovršiti i ispunjenje naloga uzeti u obzir prilikom izricanja sankcije.

(9) Nakon što izrekne sankciju, Komisija daje rok od 30 dana da imenovani zvaničnik, nosilac izvršne funkcije ili savjetnik otkloni razloge koji su ga doveli do sukoba interesa".

Član 6.

Iza člana 16. dodaje se novi član 16a. koji glasi:

"Član 16a.

Prijedlog za razrješenje i poziv izabranom zvaničniku, nosiocu izvršne funkcije ili savjetniku za podnošenje ostavke

(1) U slučaju da i nakon isteka roka iz člana 16. stav (9) ovog zakona izabrani zvaničnik, nosilac izvršne funkcije ili savjetnik ne otkloni razloge koji su ga

doveli do sukoba interesa, Komisija bez odgađanja dostavlja obrazloženi prijedlog za razrješenje izabranog zvaničnika, nosioca izvršne funkcije ili savjetnika nadležnom organu vlasti koji je izvršio imenovanje ili poziva izabranog zvaničnika, nosioca izvršne funkcije ili savjetnika na podnošenje ostavke.

(2) Ako je izabrani zvaničnik, nosilac izvršne funkcije ili savjetnik razriješen javne dužnosti u skladu sa stavom (1) ovog člana, organ vlasti koji je razriješio zvaničnika o tome će obavijestiti Komisiju.

(3) U slučaju neprihvatanja prijedloga Komisije za razrješenje izabranog zvaničnika, nosioca izvršne funkcije ili savjetnika organ vlasti, nadležan za imenovanje, dužan je iznijeti razloge odbijanja prijedloga.

(4) Ako izabrani zvaničnik, nosilac izvršne funkcije ili savjetnik ne bude razriješen dužnosti, odnosno ne podnese ostavku protivno odredbama člana 16. ovog zakona i ovog člana ili ne otkloni razloge koji su ga doveli do sukoba interesa, Komisija će izricati nove sankcije obustave isplate dijela neto mjesečne plaće u skladu s ovim zakonom do otklanjanja razloga, odnosno napuštanja funkcije.

(5) U slučaju kada Komisija pozove na podnošenje ostavke izabranog zvaničnika, nosioca izvršne funkcije ili savjetnika na obavljanje javne dužnosti, poziv se objavljuje u "Službenim novinama Federacije BiH", dnevnim novinama koje se distribuiraju na teritoriji cijele Bosne i Hercegovine i na internetskoj stranici Komisije.

(6) Novčane kazne iz člana 16. ovog zakona i iz ovog člana uplaćuju se u Budžet Federacije Bosne i Hercegovine."

Član 7.

Ovaj zakon stupa na snagu narednog dana od dana objavljivanja u „Službenim novinama Federacije BiH“.

O B R A Z L O Ž E N J E

Z A K O N A

O IZMJENAMA I DOPUNAMA ZAKONA O SUKOBU INTERESA U ORGANIMA VLASTI U FEDERACIJI BOSNE I HERCEGOVINE

I. - USTAVNI OSNOV

Ustavni osnov za donošenje ovog zakona sadržan je u odredbi člana IV. A. 20. (1) d) Ustava Federacije Bosne i Hercegovine, gdje je propisano da Parlament Federacije Bosne i Hercegovine donosi zakone o vršenju funkcija federalne vlasti.

II. - RAZLOZI ZA DONOŠENJE

Razlozi za donošenje ovog zakona sadržani su u potrebi usklađivanja ovog zakona sa Zakonom o sukobu interesa u institucijama vlasti Bosne i Hercegovine, s obzirom da je Parlamentarna skupština Bosne i Hercegovini usvojila Zakon o izmjenama i dopunama Zakona o sukobu interesa u institucijama vlasti Bosne i Hercegovine („Službeni glasnik BiH“, broj 87/13) kojim je osnovana Komisija za odlučivanje o sukobu interesa koja će umjesto Centralne izborne komisije Bosne i Hercegovine, odlučivati o sukobu interesa.

III. - OBRAZLOŽENJE PRAVNIH RJEŠENJA

Odredbom člana 1. je propisano da izabrani dužnosnici, nosioci izvršnih funkcija i savjetnici dostavljaju redovne finansijske izvještaje kako je predviđeno zakonom i propisima „Komisije za odlučivanje o sukobu interesa Bosne i Hercegovine“, umjesto „Centralne izborne komisije Bosne i Hercegovine“ kako je to ranije bilo predviđeno.

Odredbom člana 2. mijenja se naziv poglavlja koje glasi „Implementacija i postupak pred Komisijom za odlučivanje o sukobu interesa, umjesto ranijeg naziva „Implementacija i postupak pred Centralnom izbornom komisijom“

Odredbom člana 3. propisano je da se postupak pred Komisijom za odlučivanje o sukobu interesa i žalbeni postupak, pokreće i vodi u skladu sa odredbama Zakona o sukobu interesa u institucijama vlasti Bosne i Hercegovine.

Odredbom člana 4. propisano je da se postupak pred Komisijom pokreće i vodi u skladu sa Zakonom o sukobu interesa u institucijama Bosne i Hercegovine.

Odredbom člana 5. propisane su sankcije i visina kazni koje Komisija može izreći izabranom zvaničniku, nosiocu izvršne funkcije ili savjetniku u slučajevima kada se utvrdi da su povrijeđene odredbe Zakona o sukobu interesa u organima vlasti u Federaciji Bosne i Hercegovine.

Odredbom člana 6. propisano je razrješenje i podnošenje ostavke izabranog zvaničnika, nosioca izvršne funkcije ili savjetnika, ukoliko dobrovoljno ne otklone razloge koji su ih doveli do sukoba interesa, koju provodi Komisija po proceduri propisanoj u ovom članu.

Odredbom člana 7. propisano je vrijeme stupanja na snagu ovog zakona.

IV. - SREDSTVA ZA PROVOĐENJE

Za provođenje ovog zakona nije potrebno osigurati sredstva u Budžetu Federacije Bosne i Hercegovine.

ODREDBE

ZAKONA O SUKOBU INTERESA U ORGANIMA VLASTI FEDERACIJE BOSNE I HERCEGOVINE („Službene novine Federacije BiH“, broj: 70/08)

KOJE SE MIJENJAJU

II. OTVORENOST

Član 13.

Lično finansijsko stanje

Izabrani dužnosnici, nosioci izvršnih funkcija i savjetnici dostavljaju redovne finansijske izvještaje kako je predviđeno zakonom i propisima Centralne izborne komisije Bosne i Hercegovine.

III. IMPLEMENTACIJA I POSTUPAK PRED CENTRALNOM IZBORNOM KOMISIJOM BOSNE I HERCEGOVINE

Član 14.

Implementacija

Centralna izborna komisija Bosne i Hercegovine odlučuje da li neko stanje, postupak ili radnja predstavljaju kršenje odredaba ovog zakona kao i o svakoj stvari u vezi sa implementacijom ovog zakona u skladu sa Zakonom o sukobu interesa u institucijama vlasti Bosne i Hercegovine („Službeni glasnik BiH“, br. 16/02, 14/03, 12/04. i 63/08).

Član 15.

Postupak pred Centralnom izbornom komisijom Bosne i Hercegovine

Postupak pred Centralnom izbornom komisijom Bosne i Hercegovine kao i žalbeni postupak pokreće se i vodi u skladu sa Zakonom o sukobu interesa u institucijama vlasti Bosne i Hercegovine.

Član 16.

Sankcije

(1) Ako se utvrdi da neki izabrani dužnosnik, nosilac izvršne funkcije ili savjetnik krši odredbe čl. 5., 6., 8. i 9. ovog zakona, on se smatra nepodobnim da se kandiduje za bilo koju funkciju izabranog dužnosnika, nosioca izvršne funkcije ili savjetnika u periodu od četiri godine nakon počinjenog prekršaja. Pored toga izabrani dužnosnik, nosilac izvršne funkcije ili savjetnik može biti novčano kažnjen u iznosu od 1.000,00 KM do 10.000,00 KM.

(2) Ako se utvrdi da neki izabrani dužnosnik, nosilac izvršne funkcije ili savjetnik krši odredbe čl. 7., 10., 11. i 12. taj izabrani dužnosnik, nosilac izvršne funkcije ili savjetnik kažnjava se novčano u iznosu od 1.000,00 KM do 10.000,00 KM. Izabrani dužnosnik, nosilac izvršne funkcije ili savjetnik također ima obavezu vratiti poklon ili novac koji je ekvivalentan vrijednosti poklona.

(3) Novčane kazne uplaćuju se u Budžet Federacije Bosne i Hercegovine.